

增修詩話總龜

四

新刊
詩話
總龜

PDG

增修詩話總龜卷之十七

紀實門上

仁宗正月十四日御樓遣中使傳宣從官曰朕非好遊觀
與民同樂翌日蔡君謨獻詩云高列千峰寶炬森端門
方喜翠華臨宸遊不為三元夕樂事還同萬衆心天上
清光留此夜人間和氣閣春陰要和盡慶華封祝四十
餘年惠愛深

東齋錄

李叅少有吏材 仁宗竒之殿柱題其名有繁劇人所避
者必用叅自將作監簿擢至右丞樞密直學士元豐中
卒李師中以詩弔之曰當年殿柱題名處詩史

嶺南謂村市為墟柳子厚詩云青箬裹鹽歸洞客綠荷包

飯趁墟人青箱雜記

夏文莊謫守黃州時龐穎公為郡掾文莊識之優待穎公
有病意謂不起文莊親視之曰異日當為貧宰相亦有
年壽疾非所憂穎公曰宰相豈得貧耶文莊曰一等人
中貧尔故穎公作退老詩曰田園貧宰相圖史富書生
張侍郎師錫年八十有喜子登第詩曰御榜今朝至見名
心始安尔能俱中第吾遂可休官賀客留連飲家書及
覆看世科雖不繼得慰二親難張氏常有中甲科者故
有世科之語

張退傳文懿士遜趙少保叔平槩張樞相昇皆壽八十六
陳丞相文惠堯佐壽八十二杜丞相正獻衍壽八十一

富丞相文忠弼壽八十文惠致政退傳詩曰青雲岐路
遊將遍白髮光陰得最多

天聖中李康靖公若谷慶曆公邯鄲公叔皆知滑州后八
年審言又知前此邯鄲公迎康靖公到滑康靖題詩於
州解曰滑守如今是世官阿戎出守自金鑾郡人莫訝
留題別孫息期同住此看後審言刊石紀其事同前

元豐初王仲效王建作宮詞百首獻之頗有意思詩云太
皇生日最尊榮獻壽宮中未五更天子捧觴仍再拜寶
慈侍立到天明寶慈皇太后宮名太后幸景靈宮駕前
露面雙童女詩曰平明綵仗幸靈宮紫府仙童下九重
整頓瓏璚時住馬盡工閤地貌真容古今詩話

張九齡在相有謬謬匪躬之誠明皇怠於政事李林甫陰中傷之方秋明皇令高力士持白羽扇賜焉九齡作歸燕詩貽林甫曰海燕雖微眇乘春亦暫來豈知泥滓濺只見玉堂開捷戶時雙入華堂日幾迴無心與物競鷹隼莫相猜林甫知其必退恚怒稍解明皇雜錄

段文昌廣都縣人父以賣油爲業生而多智長亦有文常跨驢行鄉里笑之三十年間衣錦歸蜀蜀人贈詩曰昔日騎驢學忍飢今朝忍看錦衣歸等閒畫虎驅紅旆可畏登龍入紫微富貴不由公祖解文章生得羽毛飛廣鄉再去應惆悵猶有江邊舊釣磯鑑戒錄

羅史君向廬州人不事產業以至困窮常投福泉寺隨僧

飯而已其學未嘗廢三十年間持節歸鄉里及境至僧房書壁曰二十年前此布衣鹿鳴西上虎符歸行時賓從過前事到處松杉長舊園野老共遮官路拜沙鷗遙認隼旟飛春風一宿琉璃殿惟有泉聲愜素機同前

雷州及海外瓊崖多香木夷民以為糟飼雞犬鄭文寶詩曰沉檀香植在天涯賤等荆衡水面槎何必為糟飼鷄犬不如煨燼向豪家談苑

建州山水奇剏寺落落相望偽唐建安寺三百五十一建陽二百五十二浦城一百七十八崇安八十五松溪四十一關隸五十二僅千區杜牧江南絕句云南朝四百八十寺謂是也

劉經為虜政事舍人來奉使路中有野韭可食味絕佳作
詩云野韭長猶嫩沙泉淺更清並同前

張弘靖三世掌綸告秉鈞軸楊巨源詩云伊陟無聞祖韋
賢不到孫時稱其善與張家說家門巨源燕居吟咏年
老得疾頭數徯人言吟咏習成詩史

張鎬少有大志遊京師未始知名嗜酒鼓名人有邀之策
杖而往大醉即歸言不及世務楊國忠薦為右拾遺不
二年由諫議大夫擢中書侍郎平章事杜少陵云張公
一生江海客身長九尺鬚眉蒼名起端遇風雲會扶
顛始知壽策良正謂鎬

王元之出守黃州時蘇易簡榜下放孫何等三百五十

八人奏曰禹偁禁林宿德累為遷客飄泊可念臣欲
令榜下諸生罷集綴馬送于郊奏可送過四短亭諸生
列拜于官橋元之口占一絕付狀元為我深謝蘇公其
詩云綴行相送我何榮老鶴乘軒槐谷鶯三入承明不
知舉看人門下放諸生時諸親友觀望不敢私近惟竇
元賓執手於閣門曰天平天平得非命歟公以詩謝其
略曰惟有南宮竇員外為余垂淚閣門前

文潞公居伊洛日年七十八同時中散大夫程朝議大夫
司馬旦司封郎中致仕席汝言皆年七十八嘗為同甲
之會各賦詩潞公詩曰四人三百十二歲況是同生甲
年年占得梁園為賦客合成商嶺採芝仙清談亶亶

風生席素髮飄飄雪滿肩此會從來誠未有洛中應作
畫圖傳

荆公罷相知金陵有詩曰投老歸來一幅巾君恩猶許備
藩臣芙蓉堂下疏秋水聊與龜魚作主人再罷相以會
靈觀使居鍾山又作詩曰乞得膠膠擾擾身江湖波浪
替埃塵只同鳬鴈為閑侶不與龜魚作主人

荆公初拜相以未謝坐閣門不見客一二門生侍坐但見
輦蹇不言徐題詩於窓曰霜筠雪竹鍾山寺投老歸歟
寄此生放筆而起人莫測其意

國朝內相服金帶朱衣一名前引兩府則金毬文帶佩魚
朱衣二人謂之重金望兩制人者則曰眼前何日赤腰

下幾時黃望兩府久者則曰眼赤何時兩腰黃甚日重
熙寧中高麗使人至京師求王平甫詩有旨令京尹元厚
之抄錄以賜厚之自詣平甫求新著平甫以詩戲之曰
誰使詩仙來鳳沼欲傳賈客過雞林

福唐有老嫗當壚有舉子謂嫗曰吾能與爾致數十千乃
令嫗作酒帘題曰下臨廣陌三條闊斜倚危樓百尺高
太守王祠部達見之大喜呼嫗與錢五千酒一斛蓋詩
乃王公詠酒旗詩平生最得意者

大社二祭多差近臣王禹玉在兩禁二十年熙寧間為翰
林學士復被差題詩於齊宮曰鄰雞未動曉驂催又向
靈壇飲福盃自笑治聾知不足明年強健更重來

關右人或作京師語音俗謂之獠語士大夫亦然有太常
博士楊獻民河東人時鄜州脩城差望青砍木作詩寄
僚友曰縣官伐木入烟蘿匠石須材盡日磨蓋以鄉音
呼忙為磨也士人而徇俗不典可笑

魏仲先贈萊公詩曰有官居鼎鼐無宅起樓臺真宗即位
北使至錫宴惟兩府預焉北使歷視坐中問譯者曰孰
是無宅起樓臺相公丁晉公令譯者曰南方須大臣鎮
撫寇公撫南夏非久即還古今詩話

元微之自會稽拜尚書左丞到京未逾月出武昌詩贈夫
人裴氏曰窮冬到鄉國正歲別京華自恨風塵眼看他
遠地花碧幢還照耀紅粉莫咨嗟嫁得浮雲婿相隨即

是家夫人答曰使門初擁節御苑柳絲新不是悲殊命
惟愁別近親黃鸝啼古木朱履從清塵想到千山外滄
江正暮春

正元中李摯以宏詞振名與李行敏同姓同年登第又同
歲及同門摯答行敏詩曰因緣三紀異契分四般同

武宗怒一宮嬪謂柳公權曰得學士一詩當釋之遂進詩
曰不忿前時悞主恩已甘寂寞守長門今朝却得君王
顧重入椒房拭淚痕

柳公權從事未央宮文宗謂曰有一喜事邊上賜衣久不
時今年二月已給公可賀我以詩公權進詩曰去歲雖
無戰今年未得歸皇恩何以報春日得春衣

韓續僕射請韓熙載爲父撰神道碑玆貨外仍輟一姬爲
潤筆韓受姬及文成但叙譜系品秩及薨葬哀贈之典
而已續嫌之乃封還意其改竄熙載亟以歌姬并玆贈
還之姬登車書一絕於泥金雙帶云風柳搖搖無定枝
陽臺雲雨夢中歸他年蓬島音塵斷留取尊前舊日舞
衣同前

雄州安撫都監稱宣事云虜中好樂天詩聞虜有詩云樂
天詩集是吾師

白樂天一舉登第作詩曰慈恩塔下題名處十九人中
最少年時年二十七

大和二年崔郾侍郎東都放榜西都過堂杜紫微第五人

登第作詩曰東都放榜未花開三十三人走馬迴秦地
少年多釀酒却將春色入關來

寶曆中楊嗣復相具慶下繼放甲榜時無僕射自東洛入
覲嗣復率生徒迎于潼關宴于新昌里第元白在焉皆
即席賦詩楊汝士詩後成元白覽之失色詩曰隔座應
須賜御屏盡將仙翰入高宴文章舊價留鸞掖桃李新
陰在鯉庭再歲生徒陳賀宴一時良史舊傳馨當時疏
傳雖云盛記有茲筵醉醪醕汝士是日大醉歸謂諸子
曰今日壓倒元白

何扶大和元年登第明年再捷以一篇寄同年曰金榜題
名墨尚新今年依舊去年春花開每被紅粧問何事重

來只一人並同前

紫閣山老僧文聰說晏相來遊山獼猴萬數遍滿山谷僧

言未嘗如此之多晏詩尋漆獼猴之句

雅志

王沂公與李文定公連榜取殿魁又相繼秉鈞軸文定鎮
并門公均勞逸本鄉作詩寄之略曰錦標得雋會相繼
金鼎調元亦荐更并士兒童公再見會稽幢紱我先榮
或曰如此名實何由企及續歸田錄

潘閭在舒州瀟山寺為行者題詩鍾樓云遶寺千千萬萬

峰忘第二句頑童趁暖貪春睡忘却登樓打曉鍾孫僅

為郡官見詩曰此潘逍遙也告寺僧呼行者潘已亡去

貢父詩話

越州鰻井在應天寺井在一盤石上高數丈井纔方數寸
乃一石竅也深不可知徐浩詩云深泉鰻井開即此也
其來亦遠鰻時出遊人取之置衣袖間了無驚猜如鰻
而有鱗耳其大尾有刀跡相傳黃巢曾以劍砍之凡鰻
出必有水旱疫癘之疾鄉人以此候之

學士院有雙鵲嘗栖於西軒海棠枝上每學士會食必徘徊
翔集於玉堂之上略無驚畏因謂之靈鵲時或鳴噪
必有大詔令或宣召之事故晁公見和詩云却聞靈鵲
心應喜并予宿直詩云靈鵲先依玉樹栖二詩出樞庭
集金坡遺事

鼎州甘泉寺介官道之側泉甚佳便於漱酌行客無不留

者寇萊公南遷題東檻曰平仲經此望北闕黯然而行
未幾丁晉公又過題西檻曰謂之酌泉禮佛而去後范
諷補之安撫湖北題詩曰平仲酌泉方北望謂之禮佛
向南行烟嵐翠鎖門前路轉使高人厭寵榮古今詩話
退傳張登晚春乘安輿出南薰門繚繞都城遊金明池抵
宿指宜春門入關吏捧牌請官位書云閒遊靈沼送春
回關吏何須苦見猜八十老翁無品秩三曾身到鳳池
來同前